

豫章叢書

第五三冊

廬山紀事卷三

廣陵 桑喬 子木

山南自隘口東北行至張公嶺

黃龍山通書院

惠安星子之間有地曰隘口

山疏隘口者匡南之西道也路由廬阜黃龍兩山之間山對峙如門初甚隘過此則豁然平曠故謂之隘口

隘口之東南爲黃龍山

南康志黃龍山在縣西三十里

舊志 山秀聳蜿蜒磅礴周五十里相傳廣明中有黃龍見故名山有兩巖識云三爪踏三溪謂沙溪豬溪龍溪也

真仙通鑑 黃龍石在黃龍山上廢青霞觀後僊人文女真跨黃龍昇天處也又有文女真昇僊臺疏文女真其世代名字無可考或曰名慧通晉人黃龍山西麓有通書院

山疏 通書院在隘口南黃龍山西麓不知其所由始或曰陶淵明之祖居或曰宋以來星子人所立以祀靖節者也

棋盤石在通書院東南唐衡山下唐衡者黃龍山之支也

石 天生自然四大字元嘉元年九月一日書九小字又小醉石三字皆在棋盤石傍一小石上

溫泉經臺山

黃龍山北麓有二池水曰溫泉

周景式廬山記 主簿山在胡郎廟南數里山下有溫泉穴口圍一丈許沸泉湧出如湯冬夏常熱

豫章古今記 輔山下有二泉其一常溫

王祥經行廬山記 湯泉發石爲池者五

舊志 需陽泉在黃龍山麓

新志 湯泉有四井

山疏 溫泉今止二池井尙有存者皆沒於水中其無井處有沸泉當其沸處砂石熱不可履其不沸處卽冷如常沙而東一池尤熱可淪雞西池水稍深又有他水來雜之故其冷者三之一無所謂穴口圍丈及五池云

舊志 靈陽淨慧禪寺在湯泉上 **山疏** 俗謂之靈湯寺寺僧嘗鑿石爲龍首以出泉今並廢

山疏 往聞溫泉之下多硫故其臭亦硫惟下有丹

砂則其水赤而香不赤香亦不硫臭者其下有礬石本草礬石性熱山有礬石草木盡焦礬石入水沍寒不冰唐子西曰今積硫於水其水不溫是有硫之說未足憑也桑喬生曰夫雷火所灼其氣亦硫豈以雲雷之中而亦有硫哉蓋極陽之氣也夫溫泉者亦極陽所聚蘊隆焚如五行變化奚所不至蕭山之墟有涼澱焉可云其下有冷石耶

子鵠溫泉僧房詩雲裏前朝寺脩行獨幾年山村無施食鹽澌亦安禪古塔巢溪鳥深房開谷泉自言僧入室知處梵王天

朱晦菴溫泉詩連山西南來中斷還崛起千霄幾
千仞據地三百里飛峰下靈秀舉壑下清美逮茲
勢力窮猶能出奇偉誰然丹黃馥麝此玉池水客
來爭解帶萬劫付一洗當年謝康樂絃絕今久矣
水碧復流溫相思五湖裏

溫泉之東有謝靈運緇經臺

山疏緇經臺去溫泉不能一里臺廢址存俗謂之
經臺山

桌里虎爪崖濯纓池醉石

溫泉之北其墟爲栗里

山疏栗里者陶淵明先生所居之故里也其地在虎爪崖之下

清風橋在栗里坂去醉石一里所醉石澗水之所經也嘉靖中御史李循義更名柴桑橋

栗里之北廬阜之上有崖爲虎爪崖

山疏虎爪崖紀遊集謂之龜形山在紅花尖山西南

虎爪崖之下有濯纓池

山疏濯纓池在醉石北崖上池水出於虎爪崖石

山疏醉石濯纓之池六字

舊志栗里池在縣西南三十里淵明故居今不知處或曰卽濯纓池或曰非也新舊志濯纓栗里二池皆並載

濯纓池之下有醉石

山疏醉石在濯纓池下谷中高三四尺亦謂之砥柱石

舊志栗里源卽醉石澗在醉石傍

南史先生棄官歸籃輿時往來廬山中醉輒臥石上其石至今有耳迹及吐酒痕焉

石劄歸去來館四大字與明進士盧襄詩及他諸

詩皆在醉石上淵明醉臥此石六字歐陽國華李

升華皇祐

缺

年同遊十三字有宋三繼吳亮禪林

徐

缺

元祐三年飲於淵明醉石二十字俱在醉石

傍崖上

唐顏真卿醉石詩

張良思報韓襲勝耻事新狙擊

不肯就舍生悲縉紳嗚呼陶淵明奕葉爲晉臣自

以公相後每懷宗國屯題詩庚子歲自謂羲皇人

手持山海經頭戴漉酒巾興逐孤雲外心隨還鳥

泯**宋文公跋**有唐魯郡顏文忠公栗里詩見陳令

舉廬山記而不得其全篇雖然讀之者亦足以識

二公之心而著於君臣之義矣栗里在今南康軍治西北五十里谷中有巨石相傳是陶公醉眠處予嘗往遊而悲之爲作歸去來館於其側歲時勸相間一至焉俯仰林泉舉酒屬客蓋未嘗不賦詩也地之主人零陵從事陳公正臣聞之若有慨然於中者請大書刻石上予旣去郡請益堅乃書遺之清熙辛丑秋七月壬午新安朱熹仲晦父

無名氏醉石詩

淵明醉此石石亦醉淵明千載無

人曾山高風月清石上醉痕在石下醉源深泉石晉時有悠悠知我心似醉元非酒永懷宗國屯明

明石上痕相視欲無言沈醉非關酒深情石應領
睥睨當時人懽騰復誰醒

醉石谷中有館二曰五柳館曰歸去來館

舊志五柳館在縣西三十五里淵明故宅栗里是
也今廢

陶集註初先生之居柴桑也歲戊申屬有回祿之
變其後年庚戌乃徙居南里之南村

山疏歸去來館在醉石澗東麓今燬惟一廢丘而
澗西又別有廢丘不知爲何所土人謂二廢丘曰
上觀場下觀場而猶謂下觀場爲書堂云**朱文公**

歸去來館詩予生于載後尙友千載前每尋高士
傳獨歎淵明賢及此逢醉石謂言公所眠況復巖
壑古縹緲藏風烟仰看喬木陰俯聽橫飛泉景物
自清絕優游可忘年結廬倚蒼峭舉觴酌潺湲臨
風一長嘯詞以歸來篇

紀遊集醉石觀卽歸去來館然不知何時易館爲
觀而主以道流**太玄張天師請雷提點任醉石觀**
醉非真醉空留石上之痕歸乎不歸老却山中
之屋欲重先賢之名迹須憑當世之大才龍淵提
點栗里衣冠柴桑人物廣萬間於淮右擎一柱於

江東山蒼蒼水茫茫正爾先生之待桂團團石齒
齒合爲隱士之招非舍己以芸人是興廢而繼絕
必恭敬止得其所哉懷淵明之愛廬觀玉宇瓊樓
於傾刻得次宗而開館集瑤簪珠履於三千豈爲
菟裘之營益謹華封之祝方茲側席宜速回轅

續晉陽秋陶潛九日無酒但往坐宅邊菊叢中採
摘盈把望見王弘遣人送酒卽便就酌

醉石澗水南流與溫泉水合而入德安

桑喬生曰諺云其迹彌近其心彌遠淵明雖忠晉然
善自藏含曜不舒以酒爲名首陽爲潔柳下爲容真

不盤俗和不失身躬耕乞食其適也天曠懷獨往光景俱泯矣

般若峰耶舍塔三將軍洞靈溪觀

虎爪崖之東北爲般若峰

舊志杏壇菴外有般若峰**山疏**俗謂之紅花尖

石劄僊槎二大字

般若之下有董奉館杏林

舊志董奉館卽董真人壇杏林卽董奉種杏處並

廢山疏杏壇菴俗謂之杏桃菴非也亦廢

真僊通鑑董奉字君異三國吳時閬之侯官人也

有道術初在南中交州刺史杜燮病死三日矣奉
以二丸藥納燮口中令舉其首而搖之有頃甦半
日能起坐後四日乃能語燮告人曰初死時忽忽
如夢中見數十人衣烏衣來收燮將載露車上去
入大赤門徑以付獄獄各一戶戶纔容一人烏衣
者納燮一戶中以上封之忽聞人云太乙使使來
索燮可急開出之又聞有人伐土聲久乃得出見
二人共乘一車張赤蓋一人持節呼燮與共載至
家卽復活燮因敬事奉爲築樓以居之奉不穀食
惟飲酒啖棗脯嘗求還豫章不得居無何忽從燮

求棺變卽爲具棺相成之明日而奉死葬之後七日人有見奉于宕昌者因寄謝杜侯善自愛啟棺視之惟一帛符奉後來居廬山時時爲人治病有少年病癩瀕殆自載詣奉奉使坐密室中以布五重緘其目敕家人毋相近俄有物入其室徧舐之痛不可堪度其舌可大尺許氣息如牛久乃去始解布與少水飲旬日少年體盡赤無膚痛甚又旬日生膚如凝脂癩盡愈

集僊傳奉爲人治病不取錢重病愈者使栽杏五株輕者一株如此數年計得十餘萬株鬱然成林